



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2016. GODINU STRANKE DEMOKRATSKE AKTIVNOSTI

Broj: 03-07-6-552/17
Sarajevo, 08.05.2018. godine

SADRŽAJ

| | |
|---|---|
| MIŠLJENJE REVIZORA | 3 |
| 1. UVOD | 4 |
| 2. PREDSTAVLJANJE POLITIČKE STRANKE | 4 |
| 3. OPIS PREGLEDA I KONTROLE FINANSIJSKOG IZVJEŠTAJA | 5 |
| Predmet pregleda i kontrole | 5 |
| Cilj pregleda i kontrole | 5 |
| Obim pregleda i kontrole | 5 |
| 4. PRETHODNE KONTROLE I REVIZIJE | 5 |
| 5. NALAZI I PREPORUKE | 5 |
| 5.1. NALAZI..... | 5 |
| 5.2. PREPORUKE | 9 |

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Stranke demokratske aktivnosti za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskog izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2016. godinu, utvrđeno je da je Stranka demokratske aktivnosti prekršila odredbe člana 4. stav (1), člana 5. stav (4), člana 8. stav (1) i stav (4), člana 11. i člana 12. stav (1), stav (4) i stav (5) Zakona o finansiranju političkih stranaka.

Pregledom, odnosno kontrolom finansijskih izvještaja, osim gornjih napomena nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Stranke demokratske aktivnosti za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Stranka demokratske aktivnosti se finansirala iz sljedećih izvora:

| R/B | Izvori finansiranja | Iznos (KM) | Struktura (%) |
|-----------|--|-------------------|---------------|
| 1. | Članarina | 0,00 | 0,00 |
| 2. | Prilozi fizičkih lica (3-a) | 42.649,57 | 11,10 |
| 3. | Prilozi pravnih lica (3-b) | 15.500,00 | 4,03 |
| 4. | Prihodi od imovine (3-c) | 0,00 | 0,00 |
| 5. | Prihodi od dobiti preduzeća u vlasništvu političke stranke (3-d) | 0,00 | 0,00 |
| 6. | Prihodi od poklona (3-e) | 0,00 | 0,00 |
| 7. | Prihodi iz budžeta (3-f) | 325.990,60 | 84,86 |
| 8. | Prihodi od propagande (3-g) | 0,00 | 0,00 |
| I | Ukupni prihodi (1-8) | 384.140,17 | 99,99 |
| II | Ostali prihodi i drugo | 0,90 | 0,01 |
| | Izvori finansiranja (I+II) | 384.141,07 | 100,00 |

U godišnjem finansijskom izvještaju stranka je iskazala rashode u ukupnom iznosu od 505.773,14 KM.

2. PREDSTAVLJANJE POLITIČKE STRANKE

Naziv političke stranke je Stranka demokratske aktivnosti. Skraćeni naziv stranke je A-SDA.

Stranka demokratske aktivnosti je registrovana kod Općinskog suda u Bihaću, rješenjem broj: 017-0-RegPo-08-000002 od 08.02.2008. godine.

Sjedište stanke je u Cazinu, Cazinskih brigada bb.

Lice ovlašteno za zastupanje Stranke demokratske aktivnosti je Nermin Ogršević, predsjednik stranke.

Lice ovlašteno za podnošenje finansijskih izvještaja za 2016. godinu je Dr. sc Muhamed Alić.

Prema podacima iz godišnjeg finansijskog izvještaja za 2016. godinu, organizacionu strukturu Stranke demokratske aktivnosti čine:

- Centrala A-SDA u Sarajevu,
- Centrala A-SDA u Cazinu,
- Centrala A-SDA u Tuzli,
- 4 kantonalna odbora,
- 5 gradskih odbora i
- 22 općinska odbora.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Stranke demokratske aktivnosti za 2016. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je ostvarila troškove izborne kampanje u okviru zakonom utvrđenog limita.

Obim pregleda i kontrole finansijskih izvještaja Stranke demokratske aktivnosti obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja, sa posebnim naglaskom na prihode iz budžeta.

4. PRETHODNE KONTROLE I REVIZIJE

Služba za reviziju je izvršila pregled, kontrolu i reviziju finansijskih izvještaja Stranke demokratske aktivnosti u periodu od 2008. do 2015. godine, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon izvršenog pregleda finansijskog izvještaja za 2015. godinu, izdat je izvještaj o pregledu sa mišljenjem revizora, nalazima i preporukama stranci da finansijska sredstva obezbijeđena za finansiranje stranke koristi u skladu sa utvrđenim programom utroška sredstava, da u poslovnim knjigama i finansijskom izvještaju evidentira sve donacije, uključujući nenovčane, da se prilozi u novcu uplaćuju na transakcijski račun centrale stranke, da se ne finansira iz izvora koji su zabranjeni političkim strankama, da poslovne knjige vodi u skladu sa računovodstvenim propisima, da uspostavi tačne evidencije o prihodima, rahodima i obavezama stranke i da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka

Nerealizovane preporuke:

Na osnovu uočenih nedostataka u godišnjem finansijskom izvještaju za 2016. godinu, utvrđeno je da Stranka demokratske aktivnosti nije ispoštovala date preporuke.

5. NALAZI I PREPORUKE

5.1. NALAZI

a) Stranka demokratske aktivnosti je prekršila odredbe člana 4. stav (1) Zakona o finansiranju političkih stranaka¹.

- Programom utroška sredstava za 2016. godinu Stranka demokratske aktivnosti je na nivou centralnih organa stranke planirala troškove u iznosu od 181.000,00 KM.

Uvidom u poslovne knjige i finansijsku dokumentaciju stranke, utvrđeno je da je stranka na nivou centralnih organa ostvarila režijsko-administrativne troškove u iznosu od 215.143,03 KM i

¹ U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

troškove propagande u iznosu od 75.500,01 KM, a da iste planom nije predvidjela, iako je 2016. godina bila izborna.

Stranka u okviru plana na nivou centralnih organa nije predvidjela izdatke za kupovinu osnovnih sredstava, a isti su nastali u iznosu od 41.442,00 KM.

Stranka je svoje troškove u odnosu na program utroška sredstava za 2016. godinu ostvarila u većem iznosu za 109.643,04 KM.

- Stranka je na nivou svojih kantonalnih, gradskih i općinskih odbora ostvarila troškove u iznosu od 215.130,10 KM za koje uopšte nije donijela program utroška sredstava za 2016. godinu.

S obzirom da sredstva nije utrošila u skladu sa programom utroška za 2016. godinu prekršene su odredbe člana 4. stav (1) Zakona o finansiranju političkih stranaka

b) Stranka demokratske aktivnosti je prekršila odredbe člana 5. stav (4) Zakona o finansiranju političkih stranaka.

Politička stranka nije u poslovnim knjigama i finansijskom izvještaju evidentirala nenovčane donacije po osnovu besplatnog korištenja poslovnih prostora Udruženja žena „Ključki biseri“ Ključ i Općine Bosanska Krupa.

- Prema podacima koje je, aktom broj: 05-49-980/17 od 10.04.2017. godine dostavila Općina Ključ, poslovni prostor zgrade Doma kulture Općina je dodijelila na korištenje Udruženju građana „Ključki biseri“ iz Ključa. Ovo udruženje građana je Općinskom odboru Stranke demokratske aktivnosti u Ključu dio prostora, površine 18,60 m², dodijelilo na korištenje bez naknade.
- Općina Bosanska Krupa je u aktu broj: 01/V-47/17 od 10.04.2017. godine, navela da je Općinskom odboru Stranke demokratske aktivnosti dodijelila dvije kancelarije na korištenje bez naknade.

Stranka demokratske aktivnosti je korištenjem poslovnih prostorija bez plaćanja zakupnine ostvarila nenovčane donacije, koje je u skladu sa članom 5. stav (4) Zakona o finansiranju političkih stranaka bila obavezna evidentirati u poslovnim knjigama i prijaviti u godišnjem finansijskom izvještaju koji je podnijela Centralnoj izbornoj komisiji BiH.

c) Pregledom godišnjeg finansijskog izvještaja za 2016. godinu, utvrđeno je da je Stranka demokratske aktivnosti prekršila odredbe člana 8. stav (1) i (4) Zakona o finansiranju političkih stranaka.

- (1) Stranka demokratske aktivnosti je tokom 2016. godine besplatno koristila prostorije Udruženja žena „Ključki biseri“ Ključ, a što nije u finansijskom izvještaju iskazala na obrascu 3-e (prilozi pravnih lica).

Na osnovu prikupljene dokumentacije, utvrđeno je da se Udruženje žena „Ključki biseri“ Ključ finansiralo javnim sredstvima.

Stranka demokratske aktivnosti je besplatno koristila prostorije Udruženja, čime su prekršene odredbe člana 8. stav (1) tačka g) Zakona o finansiranju političkih stranaka.

- (2) Na osnovu obavljenog pregleda finansijskog izvještaja, utvrđeno je da je Stranka demokratske aktivnosti primila priloge pravnih lica koja su sklopila ugovore o javnim nabavkama roba, radova i usluga sa organima izvršne vlasti na svim nivoima u Bosni i

Hercegovini čija je vrijedost veća od 10.000,00 KM, u ukupnom iznosu od 1.678,65 KM, čime je prekršila odredbe člana 8. stav (4) Zakona o finansiranju političkih stranaka.

- Stranka je u obrascu 3-b (prilozi pravnih lica) iskazala novčanu donaciju pravnog lica „Balegem“ d.o.o. Gradačac u iznosu od 1.000,00 KM, što odgovara podacima iz izvoda sa transakcijskog računa.

Na osnovu podataka koje su dostavili Općina Gradačac i Vlada Brčko distrikta BiH, utvrđeno je da je Općina Gradačac tokom 2016. godine sa pravnim licem „Balegem“ d.o.o Gradačac imala sklopljene Ugovore o izvođenju radova na rekonstrukciji lokalnih puteva, regulaciji rijeke i izgradnji sportskih poligona, čija ukupna vrijednost iznosi 1.911.359,31 KM, dok je Vlada Brčko distrikta BiH sa istim pravnim licem sklapala Ugovore čija je vrijednost u 2016. godini iznosila 905.765,49 KM.²

- Uvidom u poslovne knjige stranke utvrđeno je da je stranka prilikom evidentiranja poslovnih promjena vezanih za kupovinu i prodaju automobila evidentirala popust pri kupovini putničkog automobila u iznosu od 678,65 KM. S obzirom da dobavljač na svom računu nije iskazao odobreni popust, evidentirani popust u iznosu od 678,65 KM predstavlja prilog stranci i to zabranjeni.

Na osnovu podataka koje je dostavilo Ministarstvo unutrašnjih poslova Unsko-sanskog kantona Bihać, utvrđeno je da je ovo ministarstvo u 2016. godini sklopilo Ugovor o nabavci putničkog motornog vozila sa pravnim licem „Una-Auto“ d.o.o. Bihać.

d) Politička stranka je prekršila odredbe člana 11. i člana 12. stav (1) i stav (4) Zakona o finansiranju političkih stranaka³.

Na osnovu obavljenog pregleda godišnjeg finansijskog izvještaja i finansijske dokumentacije, utvrđeno je da Stranka demokratske aktivnosti nije, u skladu sa računovodstvenim propisima i odredbama Zakona o finansiranju političkih stranaka, uspostavila, potpune i tačne evidencije o prihodima i rashodima, obavezama stranke na dan 31.12.2016. godine i stanju novčanih sredstava, čime je prekršila odredbe člana 11. i člana 12. stav (1) Zakona o finansiranju političkih stranaka. Finansijski izvještaj, koji je podnijela Centralnoj izbornoj komisiji BiH, stranka nije popunila u skladu sa članom 12. stav (4) ovog Zakona i Pravilnikom o godišnjim finansijskim izvještajima političkih stranaka—u daljem tekstu: Pravilnik.

- (1) Uvidom u poslovne knjige stranke utvrđen je niz knjigovodstvenih propusta i nepravilnosti, što za rezultat ima pogrešno iskazivanje prihoda iz budžeta. Kontrolom finansijskog izvještaja utvrđeno je da je stranka u finansijskom izvještaju kod OO A-SDA Velika Kladuša iskazala prihod iz budžeta u negativnom iznosu (minusu) od 892,86 KM, što bi značilo da je stranka umjesto da primi sredstva ista isplatila.

Takođe, promet gotovine putem blagajne osam organizacionih dijelova stranke⁴, nije vršen na propisan način, niti u skladu sa načelima blagajničkog poslovanja. Stranka je za potrebe plaćanja vršila prenos gotovinskih sredstava iz jednog organizacionog dijela stranke u drugi, iako organizacioni odbori stranke imaju otvorene transakcijske račune.

² Analitička kartica dugovni promet u 2016. godini.

³ Zakon o finansiranju političkih stranaka („Službeni glasnik BiH“, broj 95/12)

⁴ Pored prenosa značajnih iznosa, stranka je vršila i prenos gotovine iz blagajne Cazin, Živinice i Doboj Istok u zanemarivim iznosima i to 4,86 KM, 0,08 KM i 0,04 KM.

- (2) Politička stranka u obrascu 2. finansijskog izvještaja (Pregled prometa svih transakcijskih računa političke stranke) nije prijavila transakcijski račun broj 1607010000004477 otvoren kod Vakufske banke DD Sarajevo. Na zahtjev da dostavi izvode stranka u svom aktu navodi da po ovom računu nije ostvaren promet u 2016. godini.
Neiskazivanjem transakcijskog računa stranka je prekršila odredbe člana 11. Pravilnika.
- (3) U obrascima 3 i 3-e finansijskog izvještaja (Nenovčane donacije i računi koje stranka nije imala obavezu platiti) stranka nije iskazala nenovčane donacije po osnovu besplatnog korištenja prostora koji su vlasništvo općina Ključ i Bosanska Krupa, te popusta ostvarenog prilikom kupovine automobila u iznosu od 678,65 KM, čime je prekršila odredbe člana 13. i člana 18. Pravilnika.
- (4) Stranka je u 2016. godini izvršila prodaju automobila u iznosu od 11.000,00 KM, ali i kupovinu novog kod iste auto kuće „Una-Auto“ doo Bihać.
U svojim poslovnim knjigama stranka nije adekvatno evidentirala prodaju automobila, odnosno stranka je neamortizovanu vrijednost u iznosu od 14.871,60 KM umanjila za popust pri kupovini automobila u iznosu od 678,65 KM⁵. Razliku između prodajne vrijednosti i knjigovodstvene vrijednosti, stranka je isknjižila u iznosu od 3.192,95 KM, koji nije iskazala u finansijskom izvještaju.
S obzirom da je stranka postigla prodajnu cijenu automobila u iznosu od 11.000,00 KM, a prema poslovnim knjigama neamortizovana sadašnja vrijednost automobila do momenta prodaje je iznosila 14.871,60 KM, stranka je iznos od 3.871,60 KM imala obavezu evidentirati kao gubitak po osnovu prodaje sredstava te isti iskazati u okviru rashoda stranke.
Neadekvatnim evidencijama i neiskazivanjem gubitka po osnovu prodaje osnovnih sredstava stranka je iskazala rashode u manjem iznosu za 3.871,60 KM.
- (5) Stranka svoje troškove nije evidentirala u momentu njihovog nastanka, te u obrascu 4.1 finansijskog izvještaja (Režijsko-administrativni i ostali troškovi) nije iskazala troškove zakupa za općinske odbore Ključ i Bosansku Krupu, dok je za neke od odbora troškove iskazala u većem iznosu za 5.899,00 KM, a za neke u manjem iznosu za 4.983,30 KM, čime je prekršila odredbe člana 22. Pravilnika.
- Stranka je iskazala troškove zakupa u većem iznosu za 5.899,00 KM u odnosu na ugovorene cijene zakupa i to: za Centralu Tuzla u iznosu od 5.229,00 KM, OO Tešanj u iznosu od 350,00 KM i OO Kakanj u iznosu od 320,00 KM.
 - Uvidom u dokumentaciju utvrđeno je da je stranka troškove zakupa za neke od odbora iskazala u manjem iznosu za 4.983,30 KM i to za: OO Živinice u iznosu od 600,00 KM, OO Bugojno u iznosu od 360,00 KM, OO Goražde u iznosu od 940,00 KM, OO Bosanski Petrovac u iznosu od 600,00 KM, OO Velika Kladaša u iznosu od 1.579,30 KM i GO Zenica u iznosu od 904,00 KM. Takođe, stranka nije iskazala ni obaveze po osnovu zakupa za gore navedene odbore.
 - Uvidom u dokumentaciju utvrđeno je da je stranka u 2016. godini evidentirala telefonske troškove u iznosu od 221,00 KM, a koji su nastali u 2015. godini, što je posljedica knjigovodstvenog propusta i pokazuje da stranka ne evidentira troškove u momentu nastanka troška.
- (6) Stranka demokratske aktivnosti nije u poslovnim knjigama i finansijskom izvještaju iskazala stvarne obaveze prema dobavljačima, čime je prekršila odredbe člana 24. Pravilnika.

⁵ Navedeni popust u iznosu od 678,65 KM stranka nije evidentirala u poslovnim knjigama (prilikom evidentiranja kupovine novog automobila).

Uvidom u akt Grada Zenica broj: 02-49-1168/17 od 12.04.2017. godine, utvrđeno je da obaveze stranke prema Gradu Zenica po osnovu zakupa iznose 1.963,40 KM. Stranka ove obaveze nije evidentirala i iskazala u godišnjem finansijskom izvještaju.

e) Stranka demokratske aktivnosti prekršila je odredbe člana 12. stav (5) Zakona o finansiranju političkih stranaka.

Stranka demokratske aktivnosti nije postupila u skladu sa zahtjevom Centralne izborne komisije BiH, tj. nije dostavila izvode za transakcijski račun broj: 1607010000004477 otvoren kod Vakufske banke ili potvrdu banke da nije bilo prometa, čime je prekršila odredbe člana 12. stav (5) Zakona o finansiranju političkih stranaka.

Uvidom u službene evidencije, utvrđeno je da na zahtjev Centralne izborne komisije BiH da dostavi izvode za transakcijski račun otvoren kod Vakufske banke ili potvrdu banke da nije bilo prometa, a koji stranka nije iskazala u finansijskom izvještaju, umjesto izvoda sa transakcijskog računa stranka je dostavila akt u kojem je navela da je račun otvoren za OO A-SDA Travnik, te da prema njihovim saznanjima nije ostvaren promet po transakcijskom računu u 2016. godini.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁶ po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, Stranka demokratske aktivnosti je u svrhu izborne kampanje mogla da potroši 597.287,10 KM.

Stranka demokratske aktivnosti je u godišnjem finansijskom izvještaju za 2016. godinu iskazala troškove propagande u iznosu od 144.740,96 KM.

5.2. PREPORUKE

Preporučuje se Stranci demokratske aktivnosti da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva obezbijedena za finansiranje stranke koristi u skladu sa utvrđenim programom utroška sredstava,*
- *da u poslovnim knjigama i finansijskom izvještaju evidentira sve donacije, uključujući nenovčane,*
- *da se ne finansira iz izvora koji su zabranjeni političkim strankama,*
- *da poslovne knjige vodi u skladu sa računovodstvenim propisima, odnosno da uspostavi tačne evidencije o prihodima, rashodima i obavezama stranke,*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka,*
- *da dostavlja dodatnu dokumentaciju,*
- *da plaćanja gotovinom svede na najmanju moguće mjeru, te plaćanja vrši putem transakcijskog računa i*

⁶ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da, imajući u vidu da se stranka finansira najvećim dijelom sredstvima iz budžeta (84,86% čini prihod iz budžeta), prikupljena sredstva troši racionalnije⁷.*

KOMENTAR:

U ostavljenom roku, Stranka demokratske aktivnosti nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2016. godinu.

Šef Odsjeka za revizijske poslove

Sanja Tošović

Revizor

Veliborka Kenjić

Pomoćnik revizora

Anela Burdžović Kapić

Šef Službe za reviziju

Mr.sc Hasida Gušić

⁷ Uvidom u poslovne knjige i dodatnu dokumentaciju utvrđeno je da je A-SDA ostvarila izuzetno visoke troškove za računovodstvene usluge pravnog lica „Finkom“ d.o.o. Tuzla u iznosu od 14.040,00 KM, te da je i pored tih usluga angažovala fizičko lice po ugovoru o djelu za sačinjavanje različitih finansijskih izvještaja koje stranka ima obavezu podnositi čije usluge iznose 4.800,00 KM.

Takođe, stranka je iskazala troškove stručnog obrazovanja u iznosu od 1.050,00 KM. Uvidom u račune Udruženja za poslovnu izvrsnost Tuzla nije moguće utvrditi kome je usluga pružena i koja je svrha iste.